

TRADITIONAL ARTS & CULTURE FUND

Slatan-tomhais agus Stiùiridhean do Thagraichean

1. AN STÒRAS	2
2. CÒ DH'FHAODADH TAIC IARRAIDH?	2
3. AG ULLACHADH IARRTAIS	4
4. TEIRMICHEAN is CUMHAICHEAN	4
5. CO-IONNANACHD, IOMADACHD AGUS IN-GHABHALTAS	7
6. TAGRAICHEAN SOIRBHEACHAIL	7
7. TAGRAICHEAN NEO-SHOIRBHEACHAIL	8
8. EISIMPLEIREAN DE BHUIDSEATAN	8

1. AN STÒRAS

'S e stòras a th' ann am Maoin Ealain is Cultair Traidiseanta (*Traditional Arts and Culture Fund* - TACF) a tha maoinichte le Alba Chruthachail, air a riaghladh le TRACS (Ealain agus Cultar Traidiseanta na h-Alba - *Traditional Arts and Culture Scotland*) agus a tha fosgailte do bhuidhnean agus daoine fa leth. Tha Maoin Ealain is Cultair Traidiseanta a' toirt taic do luchd-ealain traidiseanta gus obair a chruthachadh, a chur air an àrd-ùrlair, a chur air chuairt no a thaisbeanadh. Gheibhear taic airson leasachadh proifeiseanta is ionnsachadh cuideachd.

Tha £43,000 ann ri thoirt a-mach ann an 2025-26. Ged a tha TRACS a' riaghladh na maoine, thèid tabhartasan aontachadh le pannal de chomhairlichean agus thèid pròiseactan a sgrùdadh agus a mheasadh le luchd-obrach bho TRACS agus Alba Chruthachail.

2. CÒ DH'FHAODADH TAIC IARRAIDH?

[BRIOG AN SEO GUS DEARBHADH A BHEIL THU ION-ROGHNACH MUS DÈAN THU TAGRADH](#)

Tha ion-roghnachd airson TACF a rèir prìomhachasan coitcheann Alba Chruthachail airson maoineachadh, agus gheibhear stiùireadh air seo le bhith a' briogadh air a' cheangal gu h-àrd. San fharsaingeachd, faodaidh daoine a tha 18 bliadhna a dh'aois no nas sine, buidhnean agus comainn stèidhichte ann an Alba, no a tha a' dèanamh obair ann an Alba, tagradh a dhèanamh, ach bu chòir dhut dèanamh cinnteach gu bheil thu airidh mus lìon thu am foirm tagraidh.

Feumaidh tagraichean dearbhadh gu bheil eachdraidh mhath aca agus/no dealas proifeasanta aca ann an co-dhiù aon de na cruthan ealain traidiseanta a leanas mar a thathar gan cleachdadh ann an Alba an-diugh:

- Ceàird Thraidiseanta
- Dannsa Traidiseanta
- Ceòl Traidiseanta
- Seanachas Traidiseanta

Bu chòir do thagraichean beachdachadh air a' phàirt a bhios aig a' phròiseact aca ann a bhith a' sgrùdadh, a' tuigsinn agus a' leasachadh an comas cruthachail, a' cuideachadh le bhith a' cumail suas cleachdadh ealanta agus a' coileanadh feumalachdan leasachaidh pearsanta sam bith gus seasmhachd a thogail.

Cha ghabh TACF a chleachdadh mar cho-mhaoineachadh le maoinachadh eile bho Alba Chruthachail.

Tha eisimpleirean de thagraidhean soirbheachail bho chuairtean roimhe de TACF (air an robh *Tasgadh*) rim faighinn [an seo](#) mar stiùireadh.

Is urrainn Maoin Ealain is Cultair Traidiseanta MAOINEACHADH A THOIRT DO NA LEANAS: • Cruthachadh, cluich, cuairtean agus a bhith a’ taisbeanadh ealainean is ciùird thraidiseanta ann an Alba. • Pròiseactan leasachaidh agus ionnsachaidh proifeasanta	Chan urrainn Maoin Ealain is Cultair Traidiseanta MAOINEACHADH A THOIRT DO NA LEANAS: • Ceannach uidheamachd* • Clàraidhean albam no EP, no ullachadh air an son, mura h-eil clàraidhean airson adhbharan brosnachaidh a-mhàin far nach eil iad gu bhith air an reic • Pròiseactan film/bhidio ach a-mhàin ma tha a’ bhuannachd do na h-ealainean traidiseanta, no do luchd-ealain, air a mhìneachadh gu soilleir • Obair le oileanaich a th’ ann am foghlam aig an àm seo • Co-fharpaisean
--	---

* Bu chòir do luchd-ciùird a tha ag iarraidh cuideachadh le bhith a’ ceannach uidheamachd beachdachadh air [Duaisean Luchd-ealain Lèirsinneach is Luchd-ciùird Alba Chruthachail \(VACMA\)](#), a tha a’ toirt taic do cheannach “uidheam riatanach [...] a chuidicheas gu soilleir thu gus a bhith ri deuchainneachd no gus do chleachdadh a leasachadh”.

3. AG ULLACHADH IARRTAIS

Ma tha feum agad air soilleireachadh a thaobh ion-roghnachd no cuideachadh gus an tagradh agad a dhèanamh, cuir post-d gu TRACS aig finance@tracscotland.org.

Faodaidh gach tagraiche tagradh a chur a-steach airson duais eadar £250 agus £1,200. (Bu chòir do thagraichean a dh’fheumas barrachd air £1,200

beachdachadh air tagradh a dhèanamh gu [Maoin Fhosgailte Alba](#)
[Chruthachail do Dhaoine fa leth.](#))

Tha dà ceann-latha ann airson 2025-26:

- **Diluain, 16 Gearran 2026**
- **Diluain 4 Cèitean 2026**

Mar as trice bidh sinn a' daingneachadh gun d' fhuair sinn iarrtasan airson maoineachadh TACF taobh a-staigh 48 uairean bho gheibhear iad. Mura faigh thu dearbhadh taobh a-staigh na h-ùine sin, [cuir fios thugainn](#) gus dèanamh cinnteach gun d' fhuaras an t-iarrtas agad.

Ma tha thu ag iarraidh beagan fiosrachaidh coitcheann mu bhith a' sgrìobhadh tagradh maoineachaidh soirbheachail, dh'fhaodte gum bi [an stiùireadh seo aig Creative Lives](#) na chuideachadh. Cùm an tagradh goirid ach dèan cinnteach gun toir thu fiosrachadh gu leòr dhuinn gus an urrainn dhuinn làn mheasadh a dhèanamh air an tagradh agad.

Ged is e sgeama maoineachaidh neo-thromach ("*light touch*") a th' ann an TACF, bheir am pannal prìomhachas do thagraidhean a tha a' sealltainn ionracas ealanta, pròiseactan a tha air an rannsachadh agus air am planadh gu math, agus (far a bheil sin iomchaidh) le buannachdan agus dìleab.

4. TEIRMICHEAN is CUMHAICHEAN

- 4.1. Feumaidh tu co-dhiù sia seachdainean fhàgail eadar an ceann-latha airson tagraidhean agus ceann-latha tòiseachaidh a' phròiseict.
- 4.2. Ma tha fios agad, thoir seachad ainmean an luchd-ealain/ciùil no nan oidean ris a bheil dùil agad obrachadh, fiù 's ma tha seo an urra ri faotainneachd no a bhith a' faighinn maoinachadh. Cuidichidh seo sinn le bhith a' measadh càileachd ealanta is cruthachail do phròiseict.
- 4.3. Tha e na rùn aig TRACS (Ealain is Cultar Traidiseanta na h-Alba) agus Alba Chruthachail gum faigh luchd-ealain pàigheadh cothromach agus faodaidh tu coimhead air stiùireadh Alba Chruthachail [an seo](#) a tha a' buntainn ri tagraidhean TACF. Feumar bun-ìrean àbhaisteach a' ghnìomhachais (Aonadh an Luchd-ciùil, Equity is msaa) a thabhann do dh'oidean/luchd-cluiche agus na cosgaisean a chur sa bhuidseit agad. Thathar ag aithneachadh gum bi cuid a luchd-ealain/cleachdaichean deònach obair mar seo a dhèanamh air reat nas saoire no fiù 's an-asgaidh. Mas ann mar seo a tha a' chùis, bu chòir dhut mìneachadh nad thagradh gu bheil iad airson seo a dhèanamh agus bu chòir dhan bhuidsead agad na nì an neach-ealain/cleachdaiche a shealltainn mar thaic stuthail (*in kind*), a' gabhail a-staigh an diofair eadar an reat àbhaisteach sa ghnìomhachas agus na gheibh iad de thuarastal uatsa. Faic buidsead eisimpleireach 4 gu h-ìosal.
- 4.4. Smaoinich gu cùramach mun bhuidsead agad agus a bheil na cosgaisean is an teachd a-steach a tha fa-near dhut iomchaidh. Thoir seachad nas urrainn dhut de dh'fhiosrachadh agus dèan cinnteach gun cuir thu a-steach buidseat cothromach, i.e. bu chòir dhan teachd-a-steach - a' gabhail a-steach an tabhartas ris a bheil dùil bho TACF - a bhith co-ionnan ris na cosgaisean agaibh. Faic buidseat eisimpleireach 3 agus 4.
- 4.5. Feumaidh tu cuideachd fiosrachadh a thoirt seachad mu cho-mhaoineachadh sam bith, agus a bheil seo dearbhte no ri dhearbhadh, a bharrachd air fianais gum bi 10% de theachd a-steach air a chruthachadh. Dh'fhaodadh an teachd a-steach a nithear a bhith ann an cruth reic thiogaidean, teachd a-steach com-pàirteachais bho thùs eile no tabhartas bhon tagraiche fhèin.
- 4.6. 'S e prìomhachas a th' ann a bhith a' cumail taic ri, agus a' brosnachadh Seasmhachd Àrainneachdail. Chan eil sinn an dùil gum bi fòcas àrainneachdail aig pròiseactan, ach tha sinn ag iarraidh air a h-uile tagraiche beachdachadh air buaidh

àrainneachdail na gnìomhachd agus mìneachadh dè na ceumannan a tha iad a' gabhail gus a' bhuidhe seo a lùghdachadh anns na tagraidhean aca. Bheir sinn fa-near do seo nuair a bhios sinn a' toirt prìomhachas do thagraidhean, agus mar sin, nuair a bhios iarrtas mòr ann, is dòcha gun toir sinn prìomhachas taic a thoirt do phròiseactan agus gnìomhachdan a bheir aire dhan bhuidhe àrainneachdail aca agus a bhios ag obair gus sin a lùghdachadh.

- 4.7. Bi reusanta mu na tha thu an dùil reic agus dèan cinnteach gu bheil iad a rèir luach an tachartais no an toraidh. Cha bhiomaid dualtach maoineachadh a thoirt do chlò-bhualadh de 1,000 leabhar mur eil dùil aig an tagraiche ach mu 25 a reic. Mar eisimpleir, cha bhiodh sinn dualtach maoineachadh a thoirt do riochdachadh is brosnachadh taisbeantas ma tha dùil aig an tagraiche ri 20 neach a thàladh a phàigheas dìreach £2 an urra. Bi ciallach mu phrìsean agus cuir luach reusanta air an tairgse.
- 4.8. Ged is e £1,200 an tabhartas as motha a gheibhear, na h-iarr ach na dh'fheumas tu. Ma nithear seo, dh'fhaodte gum faigh barrachd dhaoine buannachd bho mhaoineachadh cuibhrichte TACF.
- 4.9. Faodaidh tu eileamaidean a chur san tagradh agus sa bhuidseat agad a chuireas lìbhrigeadh a' phròiseict agad ann an co-theacsa. Ach, nuair a bhios tu a' co-dhùnadh dè an ìre maoineachaidh a tha thu airson iarraidh san tagradh, cùm nad chuimhne gu bheil an TACF ag amas air taic a thoirt do chruthachadh, taisbeantas, cuairtean no taisbeanadh ealain traidiseanta na h-Alba, no leasachadh proifeasanta ann an ealainean traidiseanta Albannach. Bheir am pannal prìomhachas do thaic ris na h-eileamaidean sin de thagraidh.
- 4.10. Faodaidh tagraichean barrachd air aon phròiseact a chur a-steach ach thoir an aire gu bheil farpais cho mòr ann airson maoineachadh TACF agus nach eil e coltach gum bi e comasach dhuinn barrachd air aon tabhartas a thabhann ann am bliadhna ionmhais sam bith agus gur dòcha gun toir sinn prìomhachas do thagraichean nach d' fhuair maoineachadh roimhe.
- 4.11. Faodaidh tagraichean tagradh a dhèanamh airson tachartas bliadhnail, no tachartas den aon seòrsa gach bliadhna, ach chan eil gealltanais sam bith ann, ma thèid maoineachadh a thoirt dhan phròiseact agad aon uair, gun tèid a mhaoineachadh a-rithist. Cha bu chòir a bhith an dùil gum bi TACF na sheòrsa de mhaoineachadh cunbhalach/bun-mhaoineachadh.

- 4.12. Tha e an urra ris an tagraiche fiosrachadh gu leòr a thoirt seachad gus am bi e comasach dhan phannal measadh a dhèanamh air an tagradh aca. Ann an cuid de chùisean, far a bheil barrachd fiosrachaidh a dhìth gus co-dhùnadh a dhèanamh, dh'fhaodte gun tèid iarraidh air tagraichean an t-iarrtas aca a chur a-steach a-rithist airson an ath cheann-latha. Ma tha am pannal ga mheas iomchaidh, faodar tagraichean a stiùireadh gu maoineachadh eile aig Alba Chruthachail no sruthan maoineachaidh eile nuair a bheir iad fios-air-ais seachad.

5. CO-IONNANACHD, IOMADACHD AGUS IN-GHABHALTAS

Tha e na rùn aig TRACS dèanamh cinnteach gum bi co-ionannachd anns a h-uile gnìomhachd aige agus tha dleastanas cùmhnantail air gus sùil a chumail air a' ghealltanais sin. Mar sin feumaidh sinn fiosrachadh a chruinneachadh mu fheartan dìonta a tha air am mìneachadh ann an Achd na Co-ionannachd 2010 a bharrachd air fios mu chomasan sa Ghàidhlig.

Tha e cudromach gun toir thu seachad am fiosrachadh seo, a thèid a chleachdadh airson aithris staitistigeil a-mhàin, gus ar cuideachadh le bhith a' cur an gnìomh na achd gu h-àrd agus gus ar cuideachadh gus seirbheisean a leasachadh. Tha e air a riaghladh gu dìomhair, tha e gun urra agus cha tèid a cho-roinn le treas phàrtaidh sam bith air adhbhar sam bith. Cha bhi buaidh sam bith aig an fhiosrachadh a thèid a thoirt seachad air an tagradh agad agus thèid a làimhseachadh a rèir ar Fios Prìobhaideachd. Mura h-eil fios agad air cuid den fhiosrachadh, no ma mur eil thu airson a thoirt seachad, faodaidh tu am bogsa 'B' fheàrr leam gun freagairt' a lìonadh. Gheibhear an ceisteachan [an seo](#).

6. TAGRAICHEAN SOIRBHEACHAIL

Cuiridh TRACS fios do gach thagraiche soirbheachail taobh a-staigh 4 seachdainean bhon cheann-ama deireannach iomchaidh. Gheibh tagraichean soirbheachail litir mun tairgse a dh'innseas mar a thèid a' mhaoin a phàigheadh agus cumhaichean a dh'fhaodadh a bhith co-cheangailte ris an tairgse.

Ma thig atharrachadh sam bith air planaichean pròiseict às dèidh làimhe, feumar an cur, ann an sgrìobhadh, gu TRACS. Feumar aithisg dheireannach san riochd cheart a chur a-steach taobh a-staigh dà mhìos bho dheireadh a' phròiseict agus dh'fhaodadh gun tèid cuid de phròiseactan a thaghadh airson measadh gus dèanamh cinnteach gu bheil iad gan cur an gnìomh mar a bha dùil. Dh'fhaoidte cuideachd gun cuir sinn cuid a phròiseactan a bh' againn

roimhe fon phrosbaig air an làraich-lìn againn ach am faic daoine dè seòrsa de phròiseactan ris an cuir a' mhaoin taic.

7. TAGRAICHEAN NEO-SHOIRBHEACHAIL

Tha coltas gum faigh sinn barrachd thagraidhean a bhiodh airidh air maoin eachadh na bhios de mhaoin againn. Mura soirbhich le tagradh, bheir sinn seachad ar beachd air an tagradh agus carson nach do soirbhich leis. Gu mì-fhortanach, leis na bhios againn de thagraidhean, chan urrainn dhuinn beachdan a bharrachd a thoirt seachad mu na thagraidhean a bharrachd air seo.

8. EISIMPLEIREAN DE BHUIDSEATAN

Thoir aire shònraichte do phuingean 4.3 gu 4.9 san stiùireadh gu h-àrd agus thoir an aire gu bheil na figearan nan eisimpleirean a-mhàin agus nach bu chòir an cleachdadh mar ìrean pàighidh, prìsean thiogaidean no rudan eile den leithid.